

白喉忌表抉微
葉天士溫熱論

沈瑞麟題籤



活人
要術

謝介石



湖世良方

許寶衡



刊送白喉治法忌表抉微附溫熱論序

喉者、呼吸所由出入也、肺爲人身之華蓋、質至脆薄、常喜潤而惡燥、胃熱上炎、肺先受之、是火之炙於內者也、煙火之氣、襲於呼吸直達於肺、是火之燦於外者也、而喉皆當其衝、分寸之間、呼吸所繫、一有危難、身命隨之、故治法不可不慎也、吾滿洲之域、氣候嚴寒、禦冬之計、恃火爲活、加以塞向謹戶、氣閉不通、遇冬雪稀微、內熱益盛、迨春氣啓蟄、熱毒上衝、以故患喉症者、所在多有、其症或因外感、或由內發、初起之時、每惡寒發熱、頭痛身攣、病狀與重感冒無異、俗醫不察、誤投以辛燥發散之劑、看似外表已解、實則本病轉深、往往腫塞潰腐、致成危殆不治之症、豈不慎哉、夫喉症、亦非無外表也、要在施清潤之品、以清其熱而解其毒、斯邪退而患除、若於煙燄蒸騰之時、更以燥藥燎燃之、則以火濟火、其有不熏灼而焦爛者、乎然或又以爲熱盛、而遽以峻劑猛下、使熱毒陷塌、亦至危險、甚矣斯症處方求藥之不可以輕率從事也、白喉治法忌表抉微一書、分鎮潤消導四法施治、而

於藥品之去取禁忌、尤擇精而語詳、耐修子原序謂爲喉症之金科玉律、良非溢詞、曾君介伯擬約集同志、釀資刊送、並附以葉天士溫熱論、斯症乃溫病之一種、理解相通、治法亦相近、葉氏此論、正可互相發明也、唐陸宣公手抄方書、宋范文正曰、不爲良相、必爲良醫、曾君等之刊行是書、其濟世活人之意、亦猶是也、余故樂贊其成、而爲述其緣起如此、康德二年三月初旬宮內府大臣沈瑞麟謹序

是書爲耐脩老人以髫齡子殤于白喉證求得

洞僊妙論刊印以期濟世者也京師此症更多醫

家積習亦相類續刊以廣布之

余

之責也即耐脩

老人之志也或謂老人此舉惠及五六省澤及千

百年厥功大矣而老人方歉然不自滿曰是特行

我所安而已彼殺人者未見其有咎區區濟人之

志又何敢冀功雖然吾族丁口寥寥無幾但願此

後生齒日繁永無夭扎以此博彼尙不爲所持狹

而所欲奢乎余聞之亦若有歆動于中者亟爲付
梓夫亦志老人之志云爾光緒十有七年重光單
閏且月穀旦并身大鷲山僧觀祐陳臧敬序

洞主仙師白喉治法忌表抉微 耐修子敬錄并序跋加注

余素未習醫咽喉一症尤屬茫然今年正月余三兒自至戚汪大令處染患白喉延同鄉某甲醫診治據曰此喉痺也切不可破破則不治方用牛蒡桔梗殭蠶杏仁荊芥防風等藥一劑而汗出然鼻塞矣再劑而熱退然音瘧矣又延診之則曰邪退其半矣以前方略加增減一劑而白塊自落矣再劑而鼻流鮮血矣又延診之則曰邪皆外出矣又以原方去荊防杏仁加射干黃芩一劑而喉外暴腫再劑而喉內全爛且頑痰上壅骨節漲滿神志煩悶睡寤恍惚始知藥誤急改延某乙醫來視曰誤服表藥受患過深不可救矣姑以龍虎二仙湯灌之卒無效未幾而汪之女及婢相繼患此鑒於甲醫之失不敢服藥令老嫗挖去白塊出涎血升許尋愈幾不解其何理嗣於友人處假得鄭梅澗先生重樓玉鑰一書閱之乃知白喉一症只可滋陰不可發表甲醫所用之藥全在禁忌之列而鼻塞音瘧與白塊自落鼻孔流紅皆爲誤表不治之症惟不可破一語則與甲醫相合更無解於汪氏女婢之因破而愈也方思摘其大要刊布流傳免世滋誤乃未一月而汪君亦病此

仍不敢延甲醫亦倩老嫗搗破而病不減月延某丙醫診治其所用藥與重樓玉鑰中所載養陰清肺一方大同小異因未大效又復倍用生地惟尙不免有一二禁藥攙入服更不效病家以爲生地之誤又月延一僮醫者全用表散連劑並進而種種敗象一時俱見知爲內陷仍歸咎於養陰亦改延乙醫觀之並未出前方相示乙醫以爲症由風邪失未表散亦投蠶蟬勞勃等藥竟不救余時亦未見僮醫之方近始索觀而知當日但謂病有兩岐藥難一致前所欲摘要刊布者至此遂不敢下筆矣又一月而余妾亦病始則骨節疼痛渾身發熱喉間乾痛而無白點乃立意延乙醫診視以其向治喉症類能分別透澈必可辨悉病源及診脈象云是浮緊恐係風邪略應表散然一劑而音瘖再劑而氣逆似覺不合適有某丁醫過訪請其覆按瞿然曰此白纏喉也如何可表速服養陰清肺湯方可補救時熱尙未退探視喉間微有白象余以乙丁之言迥然相反茫無率從乃齋沐設壇敬請

洞主仙師判斷所語悉如丁言並示白喉斷無發表之論命於養陰清肺湯中加蠶食過桑葉

嗣是一月以來凡親友患此症者聞信即以養陰方相告皆二三劑即瘳已活數人矣

孔多者三片青麟丸五分爲引一劑之後即照原方不必加引至愈而止當即遵服次日即大解一次色赤黃並發斑疹遍體皆是

此種斑疹乃白喉症所恆有係服藥見功浮邪外出乃是者象切勿誤認尋常斑疹不敢滋陰改服表散以致大誤

此時熱已全退而喉間白塊遍滿矣余恪遵

仙諭始終守方五日而瘳長次兩兒次第傳染審其情狀症亦相同深信不疑即以養陰清肺湯投服或便粘痰或發斑疹服三劑而熱清喉間均稍露白點不移時而退盡竟未大發乃堅信養陰忌表四字爲治白喉者歷劫不磨之論乙醫爲余年交長虛心而善悟見此不覺五體投地愛復迭次虔請逐層質疑得

頒箴論並命作表以喚迷津前後共三千餘言一片婆心流溢行間字裏自此濟人有術所活奚止恆河沙數哉

仙師廟在奉天前於戊子歲在奉降壇勸賑凡助賑求方者莫不藥到病除神妙不可思議偶立方論洞澈源流決非凡手所能夢見此論一出岐黃家當可奉爲金科玉律不致再入歧途爰敬錄之並將張善吾所著捷要書中語之相合者分注於下刊印行世焉

洞主仙師前論 答耐修問

白喉古無此症故少專書世稱難治然非難也未明其理耳人但知肺之灼而不知由於胃之
蒸人即知胃之熱而不知由於腸之寒腸寒則下焦凝滯胃氣不能下行而上灼於鋪咽喉一
綫之地上當其衝終日蒸騰無有休息不急治與治之不當則腫且潰潰且閉矣

捷要云白喉初起惡寒發熱頭

痛背脹遍身骨節疼痛喉內或極痛或微痛或不痛而喉內微硬有隨發而白隨見者至二三日而白始見者或由白點白條白塊甚至滿喉皆白者所冷皆同

治之之法惟有以厚重之藥鎮

其上層如以巨甑蓋鼎使燄不上騰復以清涼之藥潤其次層如以濕綿禦砲使火不內射極
盛者再掃除其中宮以抽柴薪開通其下道以漏炸炭醫者之能事畢矣夫自上至中至下本
有可通之路而必開其旁門反使四塞左矣邪毒之內蘊火也實煙也尋常表邪輕煙而已此
則如蠶雲毒霧蓊蓊鬱鬱一經表散僅能紛竄於經絡之中而不能透出於皮毛之外愈入愈
深有入無出迨自知其誤翻然改計不先追其藥毒而徒盡其當然無益也解表藥之毒春用
蠶過桑葉孔多者三片夏用荷花蒂連鬚者七箇秋用葶薺苗稍黃者九枝各寸許冬用生青
果核磨汁或打碎五枚不必拘定四時但有現成鮮者可用即用之加入養陰清肺湯中爲引

天氣亢旱非
大雨不能回
潤若燭以風
其燥更甚天
人一理可以
互推

凡病爲藥誤
另延醫治如
後醫有識必
以正道補救
救之而效則
前醫猶引爲
功救而不效
則反被前醫
歸咎或前醫
未誤誤於後
醫則後醫更
不任過孰得
孰失往往混
淆可歎也
余初亦疑爲
滋陰所誤及
讀仙論向
汪處索方閱
之果有僞醫
表散二方在
丙之後乙之
前且黃芩亦
僞所命投也

一劑後照全方服不加引

捷要云如有辨症未清誤服提升開散平溫之劑視病之輕重以生薑豆礪末重者一茶碗輕者一酒杯冷水調服另煮大米粥一碗先服粥後服藥則誤服之劑即能解除矣

等語如以上四引不現成即用此法亦效此症起時發熱者多症之輕者脈不甚洪實初不見白醫者不察往往誤爲風

邪用表藥而熱退方謂有效也及白點既見而病已增重大半矣

捷要云白喉初起惡寒發熱乃毒氣初作於內至二三日喉內見白寒熱

自除或者不悟以爲表藥有功而不知不服表藥其熱亦自退也

至改服養陰一二劑而不見速效又復反覆改圖一誤再誤病其不

殆者乎故認症既的尤以守方爲第一義也

捷要云如有內熱及發熱照方服去其熱自除即白有加、仍勿改藥蓋內病不除白何能淨愈發白愈守方久久服之自有效驗

切勿求速而表散

吾謂風邪之症亦宜清解亦不宜於表散表之過當不外出而內竄勢易易也且立意

不用表藥則中下之醫不能辨症於初起者亦不致大誤而殺人玉鑰書中忌用諸藥出於名

醫手定人嫌其選擇之過泥吾猶謂其微引之未全細辛升麻桂枝蘇葉之不可用固不待言

即殭蠶蟬退馬勃等品治喉家所奉爲至寶者皆殺人之具也各宜守之如厲禁視之如酖毒

庶不誤矣查汪某之病亦是白喉藥不誤於前此之滋陰而誤於後來之表散況黃芩一味涼

入細竅猶投炭於瓶而嚴塞其口火雖滅而煙留再以厚重之藥並用而鎮之愈塞愈緊非特

不能交濟其功抑且相助爲虐其毒至死而不能出者職是故也至其女與婢之病亦均纏喉

惟係輕者童體氣盛故以挖破而效然非通法不可爲訓若以治弱人則頃刻而靡矣汪某之病胡獨不誤於此耶三郎所遇之醫學淺性泥更不足道當其來診之初白塊已遍滿但稍經涉獵者即可辨認況行道有年而猶妄用表散一再不已是何故也至三日而毒竄已深雖有神仙亦不能救甚矣牛蒡射干等藥之爲禍烈也耐修經此數端聞吾之言大旨當可明曉其擇近時喉症書之近穩者細觀各方中之用藥刪其應忌之品不可容留一擘以可用者分爲正將猛將次將三表每表分作四層上層爲鎮藥如龍膽草石膏生地元參之類次層爲潤藥如瓜蒌貝母丹皮天冬之類又次層爲消藥如厚樸神麴枳殼麥芽之類下層爲導藥如大黃元明粉車前澤瀉之類約藥四五十種按症輕重分別施治亦已足矣其中消導之藥非熱極便結不可輕用但能鎮潤得宜則中下自會通暢不可不知表後列忌用諸藥添入前人漏列者七八種注明害處俾盡人一目瞭然胸有成竹設遇醫者開方觀其所用之藥如有不列於藥隊者以及妄用禁藥者或病輕而遽用猛將者皆不可服更以服禁藥後所現不治症象臚列於後庶可觸目驚心也稟成見質於吾尙有要言

遵定藥將三表

係乞乙醫某君審正

三將之中以正將爲定法而以猛將馭其重次將馭其輕四層之中又以鎮潤爲定法而以消藥去其滯導藥利其行鎮潤之中又以養陰清肺湯爲定法而以他藥濟病之偏頗輔方之不足審定主賓因症施治若網在綱有條不紊至於禁忌之藥萬不可以一試即偶雜一二於良藥之中猶至全藥俱壞況專恃之以爲定法乎其不現種種敗象而逼悶以斃者鮮矣法戒具備行道者其詳而審焉

白喉正將

此係大中正之藥極穩極效惟中下層藥非熟甚之症大便閉結者尙須慎用

上層鎮藥

大生地
元參
煨石膏
麥冬

次層潤藥

天冬
當歸
白芍
丹皮

中層消藥

大木通
神麴
焦查肉
陳皮

下層導藥

郁李仁
知母
生土牛膝兜
澤瀉

貝母

砂仁

青寧丸

薄荷

生甘草

養陰清肺湯

日服二劑重者日服三劑若病勢無增即白加甚仍照方服始終守定不可移易

大生地

壹兩

麥冬

陸錢 去心

白芍

肆錢 炒

薄荷

貳錢 伍分

元參

捌錢

丹皮

肆錢

貝母

肆錢 去心

生甘草

貳錢

此方乃治白喉之聖藥翼然八柱顛撲不破其中但有鎮潤而無消導蓋所謂鎮潤得宜下元自會通暢無所用其消導也分兩悉照原方不可輕重小兒減半守方服去自然全愈切勿中改

如喉間腫甚者加煨石膏肆錢○大便秘結數日不通者加青寧丸貳錢元明粉貳錢○胸下漲悶者加神麴貳錢焦查貳錢○小便短赤者加大木通壹錢澤瀉貳錢知母貳錢○燥渴者加天冬參錢馬兜鈴參錢○面赤身熱或舌苔黃色者加銀花肆錢連翹貳錢

白喉猛將非極重之症以及誤服禁忌之藥漸見收象者不可輕用揭而出之所以使人知慎也

上層鎮藥

龍膽草

生石膏

犀角

次層潤藥

瓜蒌

生梔仁

連翹

川黃柏

馬兜鈴

藍草根

中層消導

中樸

枳實

萊菔子

藥下層藥

生大黃

元明粉

神仙活命湯重者日服三劑俟病稍減仍服養陰清肺湯

龍膽草 貳錢

元參 捌錢

馬兜鈴 參錢

板藍根 參錢

生石膏 伍錢

白芍 參錢

川黃柏 壹錢伍分

生甘草 壹錢

大生地 壹兩

瓜蒌 參錢

生梔子 貳錢

凡白喉初起即極疼且閉飲水即噎眼紅聲啞白點立見口出臭氣者方可照此方煎服或已延誤二三日症已危急或誤服表藥現出敗象非輕劑所能挽回者均須此方以洩其毒

如舌有芒刺謔語神昏者加犀角貳錢○大便閉塞胸下滿悶者加中樸貳錢枳實貳錢○便閉甚者再加萊菔子貳錢

生大黃貳錢○小便短赤者加知母參錢澤瀉貳錢車前子參錢

白喉次將此表為白喉初起辨別未明及症之輕者與凡風邪之症皆以此等藥清解之切不可被表表則不可救

上層鎮藥

次生地

粉葛根

次層潤藥

金銀花

冬桑葉

藿梗

枇杷葉

紫苑

柿霜

中層消藥

小木通

枳殼

炒麥芽

竹葉

下層導藥

車前子

燈心

蓮子心